

## Kaddoffele im Netz

Gestern Midaach habb ich vorm Haus die Paula getroffe. Gude, Paula, habb ich gesaacht, was bisde joo so schick, was machsden in unserne Gass? Willsde emol eroi kumme? Naa, naa, saacht die Paula druff, ich habb joo iwverhaupt koo Zeit, ich will nor bei eierne Nochbern e Kärtche oiwerfe, die werd doch moie sibbzich. Unn dann guckt se mich so komisch oo, als hätt ich mich nit gekämmt, unn saacht noch: Gestern sind mir die Kartoffeln angebrannt!

No, denk ich, die Paula babbelt joo hochdeutsch, doo werd doch nix bassiert soi unn frooch: Unn jetz iss de Karl kronk, weil err die Kaddoffele gesse hott, die ogebrennt sinn? Odder hott er doodruffhie so mett dir geschennt, dassde noch immer newer de Kapp bist? Doo guckt mich die Paula widder so oo, als wollt se merr grad mett em Scheierdoor winke: Ich bin nit newer de Kapp unn de Karl iss aach nit kronk unn er hott aach nix gesaacht, de Karl, weil der iwverhaupt nit gemerkt hott, dass mir gestern die Kartoffeln angebrannt sind.

Ich konnt merr uff de Paula ihr hochdeutsch ogebrennte Kaddoffele koon Reim druff mache unn frooch: Was machder dann, de Karl, butzder schunn widder soi Audo? Doo lässt die Paula so richdich frech ihr Gesichtsfalte spille: Ess kann soi, dass er in de Garasch iss. Ich waaß es nit, ich kumm nit von dehoom!

Also irchend ebbes iss heit mit der, die werd doch nit ...? - wo se doch schunn bald Goldern Hochzeit hawwe? Odder sie will merr was verzehe unn traut sich nit, also fong ich oo: Wo kimmsden her, Paula, erzehl merrs emol.

Unn doo saacht se: Ich kumm grad von de Riedschul, weil ich doo so en Kurs mach.

Was machsden ferrn Kurs in de Riedschul, lernsde hochdeutsch oder lernsde koche? Ei Paula, loss derr doch nit so die Werm aus de Nas ziehe!

Doo saacht se: Waaßde, warum merr gestern die Kaddoffele ogebrennt sinn? Ich habb grad in so em Buch gelese, dess heeßt: Senioren im Netz – de Karl glaabt, dass dess en Krimi iss -, unn doo habb ich enn Aacheblick nit uffgebasst ...

Paula, habb ich gesaacht, Paula, du Oos, mechst du villeicht en Kombjudekurs in de Riedschul? Ei doo konnsde mer aach bald emol e I-Mehl schicke.

Doo guckt die Paula unner sich wie e Schulmädche, was ess erstemol enn Liebesbrief geschriwwe hott: Honnes, dess habb ich doch gemacht unn habb derr des schunn die gonz Zeit saache wolle. Awwer du hosd halt die letzt Stund nit in doin Kombjude geguckt, sunnst hättstde mich verstonne. Weil unsern Lehrer, so en junge Monn, gefroocht hott, ob jemand von uns so e I-Mehl-Adress kenne det, unn doo habb ich gesaacht, ich kenn oo: „Honnes Klammeraff

komm“. Doo hott der Monn gegrinst, weil dort det noch was fehle, hott dann awwer e bisje uff soim Lepptopp erumgedrickt unn dann gesaacht: So, liebe Frau, schreiben Sie mal was! Unn doo iss merr nix onnerst oigefalle außser: Lieber Honnes, gestern sind mir die Kartoffeln angebrannt!

Eiern Honnes